

CULTURA

Lis dal Vera, ejempie per gregn e picoi

L Istitut Cultural Ladin à portà sun paladina de Cianacei e Soraga l spetacol teatrèl e prejentà l nef libret de la regoeta »Jent de Fascia«



Assunta e Valeria (te mez), fies de Lis dal Vera, sun paladina de Cianacei con la responsabola de la Biblioteka Alberta Rossi e la diretora Sabrina Rasom.



A Soraga coi pronec de Lis, Igor e Nadia.

L secont libret de la colana
»Jent de Fascia«

Dant de ge lascèr lèrga ai atores Alberta Rossi à envià sun paladina Consuelo Bonet, la joena artista da Pancià che à fat i dessegnes del libret. Dessegnes rencurè e da color che fèsc amò più rica la publicazion, outa soraldut ai bec, ma n muie gustegola ence per i gregn. Belapontin n grop de bec e bezes, anter ite ence n pronez de Lis, Emanuele, nasciù giust 100 egn do da ela, i è stac envià sun paladina e Alberta se à metù te anter, senté jabas, e la ge à let su la pruma piata del liber.

La publicazion, scrita da Alberta Rossi e Sabrina Rasom, è stata metuda ensema col didament prezios de la fies Maria Teresa e Assunta Dantone e de la responsabola del Museo Daniela Brovadan, l lurier de empaginazion è de Nicola Detomas.

La met dant, piata do piata, la storia de Lis, da canche la è nasciuda, la è doventèda na beza feruscola con n carater aiegher e gaissa de fèr, con n gran respet per la natura e la besties. De canche crepa fora la Gran Vera e la cogn se n jir con sia familia dalonc da cèsa, di recor de la scola, de canche la doventa grana, la se marida, la doventa mère e giava, l temp l passa sal Vera e chiò la mor ai 8 de firè del 1995.

Lis dal Vera l è stat ence la protagonista de doi filmac etnografics endrezè del 1981 da la Rai de Trent ensema col ICL: »Le stagioni di Lis« de Renato Morelli, prejent enstadi a Cianacei e »Penia, biografia di un paese alpino«. La diretora Rasom à recordà che chest an l regist Marco Rossitti farà n nef video dedicà a Lis dal Vera, carant'egn do, dal titol »Talis Mater«. L recort de Lis resta amò vif sal Vera e te Museo Ladin olache sia gran fotografies porta dant na femena gaerta, stozla e piena de vita, simbol de na tradizion da no desmentier, che l è belapontin i messajes che vel dèr e lascèr ence l nef libret »Lis dal Vera«.

Monica Cigolla



I bec su paladina con Alberta Rossi.



I atores de la compagnia »Tre carc de ora« à spilenà con braura.

Do la maraveosa paladina naturèla del Vera, l spetacol teatrèl »Do l vièl del saer - Lis dal Vera vel te dir vèlch« è stat prejentà en sabeda ai 14 de jené te chino Marmolèda de Cianacei e en domenìa ai 15 te La Gran Ciasa a Soraga. L Istitut Cultural Ladin Majon di Fascegn à volù l portèr ence te paisc per ge dèr l met a duc de l cognoscer e l aprijièr. Coscita i atores de la compagnia »Tre carc de ora« se à endò trat te la pèrts de Lis e sia jent per contèr la storia de chesta femena, Elisabetta Salvador, che à vivù duta

sia vita te noscia picola val, ge dajan valor a la robes scempies, ai valore de cèsa, familia, stala, ciamp e pra. Ilaria Chiocchetti, David Dorich, Ivano Favè e Letizia Pezzei col didament de Paola Costa à adatà l spetacol a la paladina e i à spilenà con braura e con sentiment, tant che ence chi che l aea jà vedù, se à endodanef emozionà.

L spetacol l è stat l'ocazion per prejentèr l nef libret dedicà belapontin a Lis dal Vera, l secondo de la regoeta »Jent de Fascia«, do da chel sun Père Frumenzio Ghetta de Martin.

Dantfora, tant a Cianacei che a Soraga, la diretora Sabrina Rasom e la responsabola de la Biblioteka Alberta Rossi à spiegà coche l è stat fat l lurier de enrescida per meter ensema l spetacol e l libret. »La fies de Lis dal Vera ne à avert i ujes de sia majon, ne à contà recorc e moscià retrac - à dit Alberta Rossi. No l è dit che semper duc se mete a la leta con sci gran disponibilità e per chest volon ge sporjer n fort develpai a duc chi de cèsa de Lis.«

Sun paladina a Cianacei l è stat envià la fies jomelines Assunta e

Valeria e a Soraga i pronec Igor e Nadia. La diretora Rasom ge à sport l libret e la i à ringraziè per sia colaborazion a chest projet per fèr cognoscer la storia de na femena simbol de duta la femenes de Fascia. N moment da comozion tel recort de na mère e giava che à lascià de bona semenzen che perpeea ence tel davegnir.

A Cianacei à portà sie salut la presidenta del Istitut Cultural Ladin Lara Battisti, l ombolt Giovanni Bernard e la senatora Elena Testor e a Soraga l ombolt Valerio Pederiva.